

事物紀原

四









事 物 紀 原

(四)

高 李

承 果

撰 訂

事物紀原卷九 凡六部共一百八十二事

農業陶漁部第四十五凡二十
六事

田畝

詩疏曰易繫辭稱神農始作耒耜則田起神農矣通典曰黃帝始立步制畝是田以畝計起自軒轅也司馬法以六尺爲步步百爲畝顧野王云秦孝公以二百三十步爲畝今又二百四十步也青齊諸部又以三百六十步爲一大畝云

田業

三代之民皆受田於公其所受之田乃王田也一夫一婦受地百畝秦孝公任衛公孫鞅廢井田開阡陌民得賣買而天下之田爲私業此民田業賣買之始也

耕

周書曰神農之時天雨粟帝耕而種之黃帝內傳曰帝昇爲天子地神獻草木述播種之利因廣耕則耕蓋始於炎帝

種

淮南子曰神農始教民播種五穀相土地之宜帝王世紀曰炎帝始教天下耕種五穀而食故黃帝述

播種之利也。呂氏春秋曰：后稷作稼。注云：烈山氏子曰柱能植百穀蔬菜。梁陶洪景本草序曰：昔神農氏之王天下，造耕種以省穀。

耒耜

易繫辭曰：包犧氏沒，神農氏作。斲木爲耜，揉木爲耒。耒耜之利，以教天下。蓋取諸益禮，含文嘉亦曰：神農作耒耜。古史考亦云：而世本則曰：倕作，又以爲咎繇作。非也。白虎通曰：古者人食禽獸肉。神農時，人多禽獸不足。神農乃因天時地利，制耒耜教人農作。高氏小史亦云：炎帝種五穀爲耒耜，以利百姓。

犁

山海經曰：稷降以百穀種之。弟曰台璽，生叔均。叔均生是，代其父及稷播百穀，始作耕。又曰：后稷百穀之孫曰叔均，是始作耕。注云：用牛犁也。是則耕之用牛，自叔均始矣。後魏賈勰齊民要術曰：趙過始爲牛耕，實勝耒耜之利。崔寔正論曰：漢武帝以趙過爲搜粟都尉，教民耕植。其法三犁共一牛，一人將之，下種挽轡，皆取備焉。又牛耕之始，自趙過也。然崔賈之論，爲有所由爾。

樓犁

魏略曰：皇甫隆爲燉煌太守，民不曉耕。隆乃教民作樓犁，省力過半。

鉏

周書曰：神農天雨粟，帝種之，作鉏鋤以墾草莽。然後五穀興，則鉏蓋神農造也。詩臣工曰：痔乃錢鏄。注

鋤鋟也世本曰倕作耨釋名曰鋤類爾雅釋器研斲謂之定李巡曰鋤也廣雅曰鋤謂之耨然則耨卽鋤矣。

鎌

說苑曰孔子聞吾丘子振鎌帶而哭然則三代之田器也。

碓

桓譚新論曰伏羲制杵臼之利後世加巧因借身踐碓而利十倍則碓蓋起於杵臼之遺法也。

碨

世本曰公輸般作碨今以碨穀首自山而東謂之碨江浙之間或曰碨編木附泥爲之所以破穀出米矣。

磨

方言曰碨謂之碨錯碓切說文曰礮石碨也方言碨以碨爲磨則磨以碨而作也蓋起於公輸作碨之

后礮古磨字

碨

後魏書云崔亮在雍州讀杜預傳見其爲八磨嘉其有濟時用遂教民爲碨此疑碨之起也。

杵臼

桓譚新論云伏羲制杵臼。世本乃云雍父作春杵臼。呂氏春秋曰赤冀作杵臼皆非也。黃帝內傳曰帝旣斬蚩尤。因刲杵臼易繫辭曰神農氏沒黃帝堯舜氏作斷木爲杵掘地爲臼。臼杵之利萬民以濟蓋取諸小過此疑杵臼之始也。唐韻作羅父作杵臼。

春

世本曰雍父作春黃帝臣也。

水車

魏略曰馬鈞居京都城內有地可爲園無水以灌之乃作翻車令童兒轉之而灌水自覆今田家有水車天旱時引水溉田者卽此器也詳此則其制起自魏馬鈞也。而漢靈帝使畢嵐作翻車設機東以引水灑南北郊路又爲自畢嵐所制矣未知孰是。

蠶絲

搜神記曰上古時有人遠征家惟一女與馬女思父戲馬曰汝能迎得吾父吾將嫁汝馬乃絕轡去得父還後馬見女輒怒父怪之女具以答父大怒殺馬曝其皮女至皮所忽蹙然卷女而行後於大樹枝得女及皮盡化爲蠶旣死因名其樹曰桑桑喪也此蠶桑之始也。皇圖要記曰伏羲化蠶爲絲又黃帝四妃西陵氏始養蠶爲絲。

機等

淮南子曰伯余之初作衣也絲麻索縷手經指結後世爲之機等體服以便此機等之始也注伯余黃帝臣一曰伯余黃帝也

織

黃帝內傳曰帝旣斬蚩尤蠶神獻綵絲稱織紝之功因之廣織於此言廣明其前有黃帝廣之爾一云淮南子言伯余之初作衣絲麻索縷手經指結蓋織之始也

陶

周書曰神農作陶尸子曰夏桀臣昆吾作陶呂氏春秋亦曰昆吾作陶高誘云昆吾高陽後吳回黎陸終之子爲夏伯制作陶冶埏埴爲器也然黃帝時有甯封人爲陶正則陶始於炎帝明矣

冶

古史考曰燧人鑄金作刀金卽冶也而周書以謂神農作冶尸子以謂造冶者蚩尤也按禮曰昔先王未有火化後聖修火之利範金合土此冶之始也蓋始於鑄木造火之後

漁

尸子曰燧人之世天下多水教人以漁易繫辭曰包犧氏之王天下結繩而爲網罟以佃以漁蓋取諸離然則自太昊始也

釣

易稱太昊以佃以漁。然釣以漁事。蓋易以結網而漁爲包犧作。則尸子所云燧人教人以漁。其釣之爲漁。當爲此乎。

獵

尸子曰。伏犧之世。天下多獸。教人以獵。易繫辭亦言。包犧氏以佃以漁。則獵始於太昊也。

羅

世本曰。包犧臣句芒作羅。羅、鳥罟也。

網

古史考曰。伏犧氏觀蒙面而作網。世本曰。句芒作易繫辭曰。包犧結繩爲網罟。抱朴子曰。太昊師蜘蛛而結網。網魚罟也。孟說錦帶前書。伏犧始爲網罟。高氏小史曰。太昊作罟網以取禽獸。

酒醴飲食部第四十六

凡二十
九事

五穀

周書曰。神農之時。天雨粟。是則初有五穀之始也。高氏小史云。炎帝種五穀。故謂之神農。

穀食

賈誼雜說曰。神農嘗百草之實。教民食穀。藝文類聚曰。神農時。民始食穀。加於燒石之上而食。

醴酪

古史考曰古有醴酪禮運曰昔先王未有火化後聖有作然後修火之利以爲醴酪注云蒸釀之也酪醉哉蓋其物出自燧人作火之後爾

酒

酒經曰空桑穢飯醞以稷麥以成醇醪此酒之始也呂氏春秋曰狄儀作酒醪變五味戰國策曰狄儀帝女造酒進之於禹甘之遂疏狄儀古史考亦曰狄儀造酒博物志曰杜康造酒魏武帝詩曰何以解我憂惟有杜康酒玉篇曰酒杜康所作陶潛集述酒詩序曰狄儀造酒杜康潤色之而黃帝內傳王母會帝於嵩山飲帝以護神養氣金液流暉之酒又有延洪壽光之酒然黃帝時已有其物但不知杜康何世人而古今多言其始造酒也一曰少康作秫酒

蠟茶

楊文公談苑云蠟茶出建州陸羽茶經尙未知之但言福建等州未詳往往得之其味極佳江左日近方有蠟面之號丁謂北苑茶錄曰剏造之始莫有知者質之三館檢討杜鎬亦曰在江左日始記有研膏茶歐陽修歸田錄亦云出福建不言所起按唐氏諸家說中往往有蠟面茶之語則是自唐有之也

龍茶

談苑曰龍鳳石乳茶宋朝太宗皇帝令造江左乃有研膏茶供御卽龍茶之品也北苑茶錄曰太宗太平興國二年遣使造之規取像類以別庶飲也

小團

歐陽修歸田錄曰茶之品莫貴於龍鳳謂之團茶慶歷中蔡君謨爲福建漕始造小片龍茶以進其品絕精謂之小團又龍茶錄後序曰團茶爲茶之至精而小團又團茶之精者蔡君謨始造歲貢云京鍊

談苑曰江左李氏別令取茶之乳作片或號京鍊的乳及骨子等是則京鍊之品自南唐始也苑錄曰的乳以降以下品雜鍊售之唯京師去者至真不雜爲時所貴意其名由此得也又云或曰開寶末方有此茶當時識者云金陵僭國唯曰都下而以朝廷爲京師今忽有此名其將歸京師乎

石乳

北苑茶錄曰石乳太宗皇帝至道二年詔造也

炙

周書曰黃帝始燔肉爲炙

魚

古史考曰燧人鑽火人始裹肉而燔之曰魚也

華物

晉陸士衡餉張華鮓華開器便曰此龍肉也試以苦酒灌之必有異試之有五色光起今人誤以鮓爲

華物由此故也六帖云

煮鹽

世本曰宿沙氏煮海水爲鹽宋衷曰宿沙衛齊靈公臣齊近海故衛爲魚鹽之利或曰宿沙氏炎帝時諸侯唐韻曰古者宿沙初作煮海爲鹽

食熟

古史考曰古初之人未有火化飲血茹毛有聖人以火德王造作鑽燧出火教人熟食號曰燧人禮舍文嘉曰燧人始鑽木以取火魚生爲熟也拾遺記曰庖犧變茹腥之食高氏小史燧人氏時茹生人多病乃鑽燧改火化生爲熟

食卵

瑞應圖曰有虞氏馴百禽夏后之世民始食卵鳳皇乃去此蓋食卵之始也

飯

周書黃帝始蒸穀爲飯也

粥

又曰黃帝始烹穀爲粥

餅

周禮籩人羞籩之實糗餌粉粢鄭康成云二物皆粉稻黍米所爲合蒸曰餌餅之曰粢蓋餌卽饁也玉燭寶典曰秋食餌者其時黍穉並收因以黏米佳味觸類嘗新遂成積習禮月令有嘗新之事疑周制也西京雜記曰戚夫人侍兒賈佩蘭說宮內時九月九日食餌令人長壽故今人以爲俗方言曰餌饁或謂之粢續事始引于寶注曰糗餌者或屑而蒸之以粢豆之味同食

麥饁

鄴中記云并州之俗冬至一百五日爲介子推冷食作乾粥食之故謂之寒食乾粥卽今之麥饁是也世俗每至清明以麥成穉以杏酪煮爲羹粥俟其凝冷裁作薄葉沃以餳若蜜而食之謂之麥饁此卽其起也玉燭寶典曰今人研杏仁爲酪以煮麥粥以餳沃之卽此也

糉

一名角黍風土記曰仲夏端午端初也以菰葉裹黏米以栗聚灰汁煮之令熟節日啖取陰陽尙包裹之象一曰因屈原也齊諧記曰原以五月五日投汨羅楚人哀之每至此日以筒貯米祭今市俗置米於新竹筒中蒸食之謂之裝筒其遺事亦曰筒糉齊諧又記曰今世人五月五日作糉汨羅之遺風也異苑曰糉屈原姊所作

餛頭

稗官小說云諸葛武侯之征孟獲人曰蠻地多邪術須禱於神假陰兵一以助之然蠻俗必殺人以其

首祭之神則嚮之爲出兵也。武侯不從因雜用羊豕之肉而包之以麪象人頭以祠神亦嚮焉而爲出兵後人由此爲饅頭至晉盧諶祭法春祠用饅頭始列於祭祀之品而束哲餅賦亦有其說則饅頭疑自武侯始也。

餅

晉束哲餅賦曰禮仲春天子食餚而朝事之籩煮麥爲麪內則諸饌不說餅然則餅之作其來遠矣。按漢書百宮表少府屬有易官主餅餌又宣帝微時每買餅所從買者輒大售說苑敍戰國事則餅蓋起於七國之時也。

胡餅

續漢書曰靈帝好胡餅京師皆食胡餅胡餅之起疑自此始也然則餅有胡漢之異矣胡餅蓋今俗所爲者是而漢餅疑是今餅也後趙石勒諱胡改爲麻餅。

蒸餅

秦漢逮今世所食初有餅胡餅蒸餅湯餅之四品惟蒸餅至晉何曾所食非作十字折則不下箸方一見於此以是推之當出自漢魏以來也。

湯餅

魏晉之代世尚食湯餅今索餅是也語林有魏文帝與何晏熱湯餅即是其物出於漢魏之間也。

不托

束哲餅賦曰。朝事之籩。煮麥爲麪。則麪之名。蓋自此而出也。魏世食湯餅。晉以來有不托之號。意不托之作。緣湯餅而務簡矣。今訛爲飮飪。亦直曰麪也。

黃兒

唐五行志曰。黃巢未入京時。都人以黃米及黑豆屑蒸食之。謂之黃賊打黑賊。唐都長安。今自陝而西。以黃米爲粉團。聚蒸之。曰黃兒。其蕎麥麪者。曰黑兒。蓋出於此也。

鹽豉

廣雅曰。苦李作豉。廣志曰。苦秦豉。則豉自一物爾。謝承後漢書。羊續爲南陽太守。鹽豉共器。三輔決錄曰。南陽舊語曰。前隊太守范仲公。鹽豉蒜葉共一筒。史記貨殖傳曰。藁麴鹽豉千答。蓋四物也。今京俗謂豉曰鹽豉。或因此云然。晉世已爲此名。世說武子云。千里蓴羹。未下鹽豉。

藏冰

周公遭變。陳后稷先公致王業之艱難。其詩曰。二之日鑿冰冲冲。三之日納於凌陰。周禮凌人掌冰。正歲十二月。令斬冰三其凌。注云。凌冰室也。三之者。爲消釋度也。春秋左氏傳。昭公四年。申豐曰。日在北陸而藏冰。西陸朝覲而出之。其藏之也。黑牡秬黍以享司寒。注。黑牡。黑牲也。

嫁娶

通典曰。遂皇氏有婦。注云。人皇是也。伏犧氏制嫁娶。以儼皮爲禮。帝王世紀曰。包犧氏都陳制嫁娶之禮。王子年拾遺記曰。包犧始嫁娶以修人道。

撒豆穀

漢世京房之女適冀奉子。奉擇日迎之。房以其日不吉。以三煞在門故也。三煞者。謂青羊烏雞青牛之神也。凡是三者在門。新人不得入。犯之損尊長及無子。奉以謂不然。婦將至門。但以穀豆與草禳之。則三煞自避。新人可入也。自是以來。凡嫁娶者。皆置草於門闌內。下車則撒穀豆。既至。盛草於側而入。今以爲故事也。

跨馬鞍

蘇氏演義曰。唐歷云。國初以婚姻之禮。皆胡虜之法也。謂坐女於馬鞍之側。此胡人尙乘鞍馬之義也。西陽雜記曰。今士大夫家婚禮。新婦乘馬鞍。悉北朝之餘風也。今娶婦家。新人入門跨馬鞍。此蓋其始也。

東牀

晉書王羲之傳曰。羲之與王承王悅爲王氏三少。郗鑒使門生求女婿於王導。導令就東廂徧觀子弟。門生歸謂鑒曰。王氏諸少並佳。然聞信至。咸自矜持。惟一人坦腹食。獨若不聞。鑒曰。此正佳婿也。訪之。

乃義之也。遂以女妻之。由是呼女婿爲東牀。

五姓

蘇氏演義曰。五音之配五姓。郭璞以收舌之音爲宮姓。以至齶上之音爲徵姓。以脣音爲羽姓。以舌著齒外之音爲商姓。以脣中之音爲角姓。又青囊經云。城寨屋宅之地。亦以五姓配五行。然則五姓之起。自郭璞始也。前漢王莽傳卜者王況謂李焉曰。漢當復興。君姓李。李者徵、火也。當爲漢輔。按此五姓之說。自漢已有之云。

媒

鄭康成曰。媒之言謀也。謀合異類使和成者。凡嫁娶之道。必由媒妁。自太昊制昏禮。則判合之義。當有所由。便應有媒矣。至周始置媒氏之官。掌萬民之判也。

婦人拜

禮曰。男拜則尚左手。女拜則尚右手。又居喪之禮。男拜稽頰。女子則俯。是古者男女之拜一也。古詩曰。長跪故夫前。五言之作。自漢李陵。推此則由漢而來。其拜猶同耳。孫甫唐書云。唐武后欲尊婦人。始易今拜。是則女屈膝而拜。始於唐武后也。

主改適

唐書公主傳。宣宗女萬壽公主下嫁之後。遂詔公主有子而寡。不得復嫁。宋朝之公主薨。其夫亦不得

復娶也

喪紀

上古親死葬之中野而喪期無數至虞舜二十有八載放勳徂落百姓如喪考妣三載四海遏密八音則三年之喪自堯舜始也三代同之故孟子曰三年之喪齊衰之服三代共之淮南子齊倍訓曰武王伐紂載尸而行海內未定故不爲三年之喪許慎注云三年之喪始於成王

喪服

通典曰喪期無數謂黃帝時心喪終身也三載遏密八音唐虞雖行心喪更三年爲限三王乃制喪服則衰絰之起自三代始也

五服

許慎注淮南子曰三月之服夏后氏之禮又云五縗之服謂三年朞九月五月三月服也然則五服之等蓋原於夏備於商周其事具在於三禮之所記云耳

母服

三代之制父在爲母服齊衰朞唐武后始請同父三年按盧履冰言上元中父在爲母三年后雖請未用也逮垂拱始行之則父在之服母三年自唐垂拱中始也

慈母服

淮南子曰魯昭公有慈母而愛之死爲之練冠故有慈母之服注云父所命已者禮記曰練冠而喪慈母自魯公始也故今五服勅有慈母服

易月

五代會要曰後唐同光三年十一月禮儀使奏曰粵自漢文益尊神器徇至公絕私之義行以日易月之制宋朝會要曰漢文帝酌變禮之宜創易月之制按前漢書文帝紀後元七年六月遺詔曰其令天下吏民令到三日釋服殿中當臨者皆以旦夕各十五舉音服大紅十五日小紅十四日纖七日釋服應劭曰凡三十六日而釋服此以日易月也顏師古曰紅與功同此喪制者文帝自率己意創爲之非有取於周禮也何以日易月乎三年之喪其實二十七月豈有三十六月之文禫又七月也應氏旣失之於前而近代學者因循謬說未之思也

含襚

凡始死以珠玉實口中曰含以衣衾贈死者曰襚襚卽今俗謂搭衣架是也穀梁曰貝玉曰含衣衾曰襚後漢趙咨遺書曰周室制兼二代重以殯葬之期衣衾稱襲衣之數然則襚周制也禮曰商王綴重三禮圖云以飯含餘粥盛之以鬲名曰重然則含商制也周人加以珠玉爾

面帛

今人死以方帛覆面者呂氏春秋曰夫差誅子胥數年越報吳踐其國夫差將死曰死者如其有知也

吾何面目以見子胥於地下乃爲幕以冒面而死此其始也風俗通曰吳王羞見子胥以帛幕面而死故後人因之制面衣說苑亦曰越襲吳吳王將死曰吾不用子胥之言至於此死者有知吾何面以見子胥也遂蒙絮覆面而死

明衣

三代以來襲有明衣唐改用生絹單衣今但新衣而已段成式酉陽雜俎曰明衣起於左伯桃也

糧罿

今喪家棺斂柩中必置糧罿者王肅喪服要記曰昔魯哀公祖載其父孔子問寧設五穀囊者公曰否也五穀囊者起自伯夷叔齊不食周粟而餓死恐其魂之饑也故設五穀囊吾父食味含哺而死何用此爲又禮檀弓曰重生道也三禮圖曰重起於商代以飯含餘粥以鬲盛之名曰重設之於庭恐神依之以食今之糧罿卽古重之遺意也

棺槨

禮檀弓曰有虞氏瓦棺鄭注云始不用薪也夏后氏堲周商之棺槧古史考曰舜作瓦棺禹作土堲作周棺湯作木槧以周土堲臣瓊曰商人作棺槧劉向曰棺槧之作自黃帝始後漢趙咨曰棺槧之造自黃帝始黃帝內傳曰帝斬蚩尤設棺槧易繫九事之八則曰古之葬者厚衣之以薪後世聖人易之以棺槧蓋取諸大過孔穎達疏云有虞瓦棺未必用木商以前槧無文按棺槧自商以後則夏已前未具

也而易繫以爲黃帝堯舜之事。

銘旌

禮記曰銘明旌也。以死者不可以別故以其旌識之後。漢趙咨遺書曰古之葬者至商有加周室制兼二代表以旌名之儀。則喪禮之有銘旌周制也。喪服小記曰書銘自商始置非周禮也。周官司常大喪共銘旌因商事爾。士喪爲銘各以其物書名於末曰某氏某之柩置於宇西階之上。商以前皆書姓男名文字無書國者。后亦不書氏至魏以爲天下之號無所復別。臣子故稱之以自別也。

桐人

今喪葬家於墉中置桐人有仰視俯聽乃蒿里老人之類段成式酉陽雜俎云桐人起於虞鄉也。

明器

禮檀弓曰孔子謂爲明器者知喪道其曰明器神明之也。塗車芻靈自古有之明器之道也。謂爲芻靈者善爲俑者不仁不殆於用人乎哉爲其像人而用之也。鄭注云俑偶人有面目似生人孔子善古而非周周官家人及葬言轡車像人是像人之起始於周也。今直以俑號明器云禮又曰夏后用明器謂竹不成用瓦不成味木不成斲琴瑟張而不平笙竽備而不和有鐘磬而無簾簾也。以俑爲明器誤矣。

寓錢

今楮錢也唐書王嶼傳曰玄宗時嶼爲祠祭使專以祠解中帝意有所禳祓大抵類巫覡漢以來葬者。

昏有瘞錢後世里俗稍以紙寓錢爲鬼事至是嶼乃用之則是喪祭之焚紙錢起於漢世之瘞錢也。其禱神而用寓錢則自王嶼始耳。今巫家有焚奏禳謝之事亦自此也。注云：漢葬者有昏寓錢，謂昏晚埋錢於壙中爲死者之用。至唐王嶼乃於喪祭焚紙錢以代之也。

娶

人之所持以蔽喪車前後以爲飾者今挽郎所執是也。禮記檀弓曰：周人牆置娶。世本曰：武王作古史考曰：周公作娶，起於周也。

挽歌

譙周法訓曰：挽歌起自田橫。通典曰：漢高帝時齊王田橫自殺，故吏不敢哭泣，但隨柩敍哀，後代相承以爲挽歌。按漢初橫死門人爲薤露，蒿里之歌，蓋從者以寄哀耳。武帝時李延年分爲二薤露送王公貴人蒿里送大夫庶士，蓋二歌之起始自橫也。摯虞新禮議曰：挽歌出於漢武帝役人勞苦歌聲哀切，遂以送終，非古制者誤矣。左傳哀公十一年會吳伐齊，將戰，公孫夏命其徒歌虞殯。杜預注云：送葬歌曲哀死也。孔穎達疏曰：虞殯謂啓殯將虞之歌，今謂之挽歌。莊子曰：繡謳於所生，必於斥苦。司馬彪注曰：繡引柩索謳，挽歌斥疏緩苦急促言引繡謳者爲用人力以挽柩者所歌，故曰挽歌。馮鑑謂起於虞殯也。然則其周人之制乎。

方相

軒轅本紀曰。帝周游時。元妃媯祖死於道。令次妃嫫嫫監護。因置方相。亦曰防喪。此蓋其始也。俗號險道神。抑由此故爾。周禮有方相氏。狂夫四夫。大喪先匱及墓。入壙以戈擊四隅。方良故葬家以方相先馳。

魮頭

宋朝喪葬令。有方相魮頭之別。皆是其品所當用。而世以四目爲方相。兩目爲魮頭。按漢世逐疫用魮頭。亦周禮方相之比也。方相氏蒙熊皮。黃金四目。以索室駁疫。鄭注云。如今魮頭是也。疑自漢始云然。荀子有仲尼之面如蒙供。則戰國已爲是名。

碑碣

管子曰。無懷氏封泰山。刻石紀功。秦漢以來。始謂刻石曰碑。蓋因喪禮豐碑之制也。刻石當以無懷爲始。而名爲自秦漢也。陸龜蒙叢目書曰。碑悲也。古者懸而窓。用木書之。以表其功德。因畱之不忍去。碑之名。由是而得。自秦漢以降。生有功德政事者。亦碑之。而又易之以石。失其稱矣。此又德政有碑之起也。陸法言廣韻曰。碑碣李斯造。疑始於嶧山之刻爾。釋名曰。本葬時所設。臣子追述君父之功。以載其上也。

神道碑

古之葬有豐碑以定。秦漢以來。死有功業。生有德政者。皆碑之。稍改用石。因總謂之碑。晉宋之世。始又

有神道碑。天子及諸侯皆有之。其刻文止曰某帝或某官神道之碑。今世尙有宋文帝神道碑墨本也。其初由立之於葬兆之東南。地理家言以東南爲神道。故以名碑爾。按後漢中山簡王薨。詔大爲修冢塋。開神道。注云。墓前開道。建石柱以爲標。謂之神道。是則神道之名在漢已有之也。晉宋之後。易以碑刻云。

葬埋

孟子曰。上世嘗有不葬其親者。其親死。則舉而委之於壑。他日過之。狐狸食之。蠅蚋姑嘬之。其穎有泚。睨而不視。蓋歸反蘿樞而掩之。則葬埋之禮疑自此起也。炎帝之前。始厚衣之以薪。葬之中野。不封不樹也。果按墳土籠也。樞土畢也。封土爲壘。古人不爲墳也。不種樹也。

合葬

禮記曰。檀弓云。季武子曰。合葬非古也。自周公以來。未之有改。又云。舜葬蒼梧之野。蓋三妃未之從也。注謂古不合葬。又季武子曰。周公蓋祔。注云。祔謂合葬。合葬自周公以來。是則周公初制此禮也。故周桓王之詩曰。死則同穴。

冢墓

黃帝內傳云。帝斬蚩尤。因置冢墓。然諸小說家往往記伏羲女媧之冢。疑後人增築云。

墓誌

炙穀子曰齊王儉云石誌不出禮經起宋元嘉中顏延之爲王球作墓誌以其無名誄故以紀行自此遂相祖習然魏侍中繆襲改葬父母制墓下埋文將以陵谷遷變欲使人有所聞知但記姓名歷官祖父姻媾而已有德業則爲銘文又隋代釀家於王戎墓得銘云晉司徒安豐元公王君之銘有數百字則魏晉已有其事不起於宋也馮鑑續事始云按西京雜記前漢杜子春臨終作文命刻石埋於墓前恐墓誌因此始也承謂昔吳季札之喪孔子銘其墓曰嗚呼有吳延陵季子之墓莊子衛靈公葬沙丘掘得石柳銘曰不馮其子靈公奪而埋之唐開元時人有耕地得比干墓誌刻其文以銅盤曰右林左泉後岡前道方世之寧茲焉是保漢滕公夏侯嬰得定葬石銘曰佳城鬱鬱三千年見白日吁嗟滕公居此室則墓之有誌其來遠矣

石羊虎

炙穀子曰秦漢以來帝王陵寢有石麟辟邪兜馬之屬人臣墓有石人羊虎柱之類皆表飾墳壠如生前儀衛風俗通曰方相氏葬日入壙驅罔像罔像好食死人肝腦人臣不敢備方相乃立其像於墓側又罔像畏虎與柏故頂上栽柏路前立虎也盧思道西征記曰新城西有漢桂陽太守趙越墓有石柱東南有亭因石柱爲名漢霍去病墓像祁連三立石人馬然則墓前之立石人柱羊虎之類皆起於漢也

禮檀弓曰幼名冠字五十以伯仲死謚周道也大戴謚法曰周公旦太公望相嗣王作謚法抱朴子曰謚始於周史記秦始皇初并天下制曰太古有號無謚中古有號死而以行爲謚

婦人謚

穆天子傳曰天子爲盛姬謚曰哀淑人此疑婦人謚之起也

后謚

謚所以易名也事雖起於周而王后亦無其禮漢初高祖之母始有昭靈之號諸后皆因帝謚以爲稱雖呂氏專政上官臨制亦無殊號東京明帝始建光烈之名後漢皇后紀論云爾按漢高祖五年二月甲午漢王即皇帝位尊先嫗曰昭靈夫人高后五年五月辛未尊曰昭靈后元紀元帝母曰恭哀許皇后張宴曰婦人從夫謚閔其見殺故兼二謚則后謚自漢祖始也

主謚

楊侃職林曰唐正元十五年故唐安公主賜謚曰莊穆謚自唐安始也唐會要曰正元十五年七月十五日追冊故唐安主爲韓國正穆故義章公主爲莊穆唐書公主傳亦云爾按唐平陽公主高祖之女起兵參佐命已謚爲昭又南史沈攸之傳言齊高帝女義興憲公主妻攸之子文和憲亦謚爾不審侃何以言自唐安公主始也

起復

禮曾子問云。子夏問曰。三年之喪。金革之事。無避也者。非與。孔子曰。吾聞老聃曰。昔者魯公伯禽有爲爲之也。注云。魯徐戎作難。喪卒哭而征之。急王事也。故春秋亦紀晉襄公墨縗之事。漢唐以來。遂有起復之禮。蓋自伯禽始也。

忌日

禮祭義曰。君子有終身之喪。忌日之謂也。忌日不用。非不祥也。言夫日志有所至。而不敢盡其私也。注曰。忌日親亡之日。不用舉他事。非不祥。言非以死爲不祥。避之。夫日猶此日。志有所至者。此心極於念親也。不敢盡其私。不敢盡心於己之私事也。又曰。文王忌日必哀稱諱。如見親然。則忌日始於周也。

博奕嬉戲部第四十八凡三

圍碁

博物志曰。堯造圍碁以教丹朱。或曰舜造也。

手談

今人目圍碁爲手談者。語云。王中郎以碁爲手談也。世說曰。王中郎以圍碁是坐隱。支公以圍碁以爲手談。王積薪碁勢譜圖曰。王郎號爲坐隱。祖約稱爲手談。由是言之。雖說有小同異。然疑晉以來語也。

蹴踘

劉向別錄曰。蹴踘者。傳言黃帝造。或曰起戰國時。蹋鞠、兵勢也。所以練武事。知有材。皆因嬉戲而講陳。

之博物志曰黃帝所作也。

投壺

禮記投壺曰。投壺之禮。主人奉矢。司射奉中。使人執壺。壺頸修七寸。腹修五寸。口徑二寸半。容一斗五升。壺中實小豆焉。爲其矢之躍而出也。壺去席二矢半。矢以柘若棘。毋去其皮。而鼓節有魯薛之異。其禮蓋自周人始也。春秋左氏傳有晉侯以齊侯宴中行穆子相投壺之禮是矣。西京雜記云。漢武時郭舍人善投壺。以竹爲矢。不用棘也。古之投壺。取中不求還。郭則激矢令還。謂之驍。言如博之立碁於北車中爲驍傑也。今投壺之用竹矢爲激。還爲驍。自郭舍人始也。

彈

歐陽詢藝文類聚曰。古者人死未有棺槨殯葬。裹以白茅。投之中野。孝子不忍視其禽獸所食。作彈以守之。吳越春秋陳音對越王曰。弩生於弓。弓生於彈。彈生於古之孝子。如上所記。則是彈起三皇之世也。

陸博

說文曰。古烏曹氏始作博。蓋夏后之臣也。事始曰。烏曹始置博陸之戲。聲譜曰。博陸采名也。孔子曰。不有博奕者乎。莊子博塞以游。

彈碁

西京雜記曰漢成帝好蹴鞠羣臣以爲勞體非至尊所宜帝曰朕好之可擇似而不勞者奏之劉向作彈碁以獻傅玄彈碁賦序曰漢成帝好蹴鞠勞人體非至尊所御因其體而作彈碁之戲起自漢代矣宋臨川王義慶著世說以爲彈碁始自魏宮裝匱戲文帝於此伎特妙用手巾角以拂碁帝客又能低頭以葛冠巾角拂碁妙逾於帝西陽雜俎曰彈碁起自魏室裝匱戲也典論曰予於他戲弄少所喜唯彈碁略盡其巧京師有馬合鄉侯東方安世張公子恨不與數子對起於魏室明矣二說非也今世尙或有其法而爲之者亦少

投子

續事始曰陳思王曹子建制雙陸置投子二唐末有葉子戲不知誰遂加至六按烏曹始置六博老子置擣捕李氏資暇引蔡澤說范睢云博者欲大投裴駟注謂投投子乃投擲之義謂擣捕五木然則捕皆有投子耳故曹植所造從么至六謂之投子取投擲義云嘉話錄曰太和已後博戲家謂重四爲堂印言重四則投子猶二也六隻蓋起近代太和文宗時年號今按唐李賀州邵撰葉子格世有其書則六隻當自邵矣潘氏紀聞譚自投子以飾四朱者因明皇與貴妃采戰將北唯重四可轉敗爲勝上擲而連呼叱之宛轉良久而成重四上大悅命高力士賜四紺也

擣捕

博物志曰擣捕老子入西戎所造或云胡亦以此卜也

買鬼

世傳唐武后初諫議大夫明崇儼能役鬼物其微時人嘗與博凡擲投子必使鬼物持其彩應呼而成隨其所欲也後人因此爲買鬼之戲就中彩名其通天火通之類云亦當時所役之物名也

象戲

太平御覽曰象戲周武帝所造而行碁有日月星辰之目與今人所爲殊不同唐牛僧孺撰元怪錄載唐寶應元年岑順於陝州呂氏凶宅夜聞鼙鼓之聲介胄人報曰金象將夜警也寤見鐵騎長數寸進曰天馬斜飛度三疆上將橫行擊四方輜車直入無迴翔六甲次第不乖行乃有一馬斜去三尺止又一步卒橫出一尺後車進已而於見處掘之卽古冢也前有金象局列馬滿枰其辭與勢正今世所爲者是則此戲於此古冢初定時已與周武帝所造不同而同名象戲也說苑雍門周謂孟嘗君足下燕則鬪象碁亦戰國之事乎故今人亦曰象碁蓋戰國用兵爭強故時人用戰爭之象爲碁勢也

彩選

彩選序曰唐之衰任官失序而廉恥路斷李賀州部譏之恥當時職任用投子之數均班爵賞謂之彩選言其無實惟彩勝而已本朝劉蒙叟陳堯佐雖各有損益而大抵取法及趙明遠削唐雜任之門盡以今制專以進士爲目時慶歷中也元豐末官制行朱昌國又以寄祿新格爲名

鬪雞

列子有紀渢子爲周宣王養鬪雞之事。左傳述季郈之雞鬪。季氏芥其羽。郈氏爲之金距。推此則茲戲之始當出於周也。

鬪草

宗懷荆楚歲時記曰。競採百藥。謂百草以蠲除毒氣。故世有鬪草之戲。

鬪牛

成都記曰。李冰爲蜀郡守。有蛟暴入水戮之。已爲牛形。約曰江神亦必牛形。白帶者我也。須臾有二牛鬪。武士射其神斃。蜀不復病水。由是鬪牛之戲。今世尙或有之。蓋自秦世之始也。

戲場

通典曰。煬帝大業二年。突厥染干來朝。帝欲夸之。追四方散樂。大集東都。自是每歲正月。萬國來朝。畱至十五日。於端門外列爲戲場。百官綵棚夾道。從昏達旦。以縱觀之。宋朝至正歲上元。闢端門起山樓。露臺棘圍。列鈞容教坊樂。及綵棚夾道。令都人縱觀者。此其始也。

角觝

今相撲也。漢武故事曰。角觝。昔六國時所造。史記秦二世在甘泉宮作樂角觝。注云。戰國時增講武。以爲戲樂。相誇角其材力。以相觝。鬪。兩兩相當也。漢武帝好之。白居易六帖曰。角觝之戲。漢武始作。相當角力也。誤矣。

俳優

列女傳曰夏桀旣棄禮義求倡優侏儒而爲奇偉之戲則優戲已見於夏后之末世晉獻公時有優施魯定公會齊侯於夾谷齊宮中之樂有俳優戲於前此蓋優戲之始也。

傀儡

世傳傀儡起於漢高祖平城之圍用陳平計刻木爲美人立之城上以詐冒頓閼氏後人因此爲傀儡按前漢高紀七年注應劭曰平使畫工圖美女遣遺閼氏而無刻木事今按列子記周穆王時巧人有偃師者爲木人能歌舞王與盛姬觀之舞旣終木人瞬目以手招王左右王怒欲殺偃師偃師懼壞之皆丹墨膠漆之所爲也此疑傀儡之始矣秦漢有魚龍曼衍之戲其事亦粗見唐李商隱宮辭曰不須看畫魚龍戲發遣君王怒偃師是以通典曰窟礮子亦曰魁礮作偶人以戲善歌舞審此知其偃師之遺事也一云本喪樂漢末始設之嘉會不知何以爲喪樂風俗通曰漢靈帝時京師賓昏嘉會皆作魁礮梁散樂亦有之北齊後主高緯尤所好也顏氏家訓云古有禿人姓郭好諧謔今傀儡郭郎子是也百戲

漢元帝纂要曰百戲起於秦漢曼衍之戲後乃有高組吞刀履火尋橦等也一云都盧尋橦都盧山名其人善緣竿百戲

舞輪

通典曰。梁有舞輪伎。今之舞車輪者。則是此戲自梁世始有之也。

高組

又曰。梁有高組伎云。今戲繩者。謂上索者是也。亦踏索之事云。非自梁始也。又有弄椀諸伎。後漢天子正旦受賀。以大繩繫兩柱。相去數丈。兩倡女對舞。行於繩上。相逢比肩而不傾。

水戲

典略曰。魏明帝使博士馬鈞作水轉百戲。巨獸魚龍曼延。弄馬列騎備。如漢西京故事。今世皆傳其法。蓋其始自馬鈞也。

影戲

故老相承言。影戲之原出於漢武帝李夫人之亡。齊人少翁言能致其魂。上念夫人無已。迺使致之。少翁夜爲方帷。張燈燭。帝坐他帳。自帷中望見之。彷彿夫人像也。蓋不得就視之。由是世間有影戲。歷代無所見。宋朝仁宗時。市人有能談三國事者。或採其說加緣飾作影人。始爲魏吳蜀三分戰爭之像。

噴拳

江淮之俗。每作諸戲。必先設噴拳笑面。有諸行戲時。嘗在故臘之末。所作之人。又多村夫。初不知其所謂也。按荆楚歲時記。有諺語云。臘鼓鳴春草生。村人並細腰。鼓戴胡公頭。及作金剛力士以逐除。今南方爲此戲者。必戴面如胡人狀。作勇力之勢。謂之噴拳。則知其爲荆楚故俗舊矣。

合生

唐書武平一傳曰。中宗宴兩儀殿。胡人穠子何懿倡合生歌。言淺穢。平一上書。比來妖伎胡人於御座之前。或言妃主情貌。或列王公名質。詠歌舞蹈號曰合生。始自王公。稍及閨巷。即是合生之原。起自唐中宗時也。今人亦謂之唱題目。

吟叫

嘉祐末。仁宗上仙。自帝卽位。至是殆五十年。天下稔於豐樂。不意邦國凶變之事。而英宗諒陰不言。能昭其功。然四海方遏密。故市井初有叫果子之戲。其本蓋自至和嘉祐之間。叫紫蘇丸。洎樂工杜人經十叫子始也。京師凡賣一物。必有聲韻。其吟哦俱不同。故市人採其聲調。閒以詞章。以爲戲樂也。今盛行於世。又謂之吟叫也。

生花

今京城有生花種植以戲者。按前漢張騫傳。漢遣趙破奴等破車師大宛。以梨軒眩人獻於朝。顏師古注云。眩與幻同。卽今吞刀履火種瓜植樹屠人戮馬之術是也。本自西域來。由是言之。種瓜植樹卽生花之事也。蓋自漢武時大宛所獻眩人始云。

打麥

唐書武元衡之將遇害也。京師童謡曰。打麥三三三。今俗兒戲有打麥。鼓掌作打麥聲。後必三拍之。抑

緣此也。

杵歌

春秋左氏傳曰。襄公十七年十一月。宋皇國父爲平公築臺。妨農功。子罕請俟農畢。公弗許。築者謳曰。澤門之誓。實與我役。邑中之黔。實慰我心。杜預注曰。周十一月。今九月。澤門。宋城門。宋國父白皙。居近澤門。子罕黑色。而居邑中。今版築役夫。歌以應杵者。此蓋其始也。其歌往往敍苦樂之意者。由此爾。呂氏春秋云。翟煎對魏惠王曰。舉大木者。前唱輿櫓。後亦應之。此舉重勸力之歌也。今人舉重出力者。一人倡。則爲號頭。衆皆和之。曰打號。此蓋其始也。七國之時。已云然矣。輿櫓淮南子道應訓作邪許。

戎容兵械部第四十九凡三十事

五兵

兵者。戈戟矛劍之總名也。太白陰經曰。神農以石爲兵。黃帝以玉爲兵。蚩尤乃鑠金爲兵。割革爲甲。始制五兵。呂氏春秋曰。蚩尤作五兵。戈、殳、戟、酋矛、夷矛也。世本蚩尤以金作兵器。然則兵蓋始於炎帝而鑠金爲刀。卽自蚩尤始矣。

黃鉞

輿服志曰。黃鉞。皇帝置內傳曰。帝將伐蚩尤。玄女授帝金鉞以主殺。此其始也。

黃帝出軍決曰牙旗者將軍之精金鼓者將軍之氣一軍之形候也卽知牙旗之製始自置軍之時猶有征伐則置之也吳孫權因之作黃龍大牙

衣甲

世本曰杼作甲杼或作與少康子也墨子亦云太白陰經曰蚩尤割革爲甲管子亦云黃帝內傳曰玄女請帝制甲冑以備身也

抹額

二儀實錄曰禹娶塗山之夕大風雷電中有甲卒千人其不被甲者以紅綃帕抹其頭額云海神來朝禹問之對曰此武士之首服也秦始皇至海上有神朝皆抹額緋衫大口袴侍衛自此抹額遂爲軍容之服

兜鍪

胄也黃帝內傳所述蓋玄女請帝製之以備身也淮南子紀論訓曰有鍪頭而捲領以王天下者矣許慎注曰蓋三皇所以鍪頭者兜鍪帽也則是黃帝之制胄亦以古鍪頭之事耳故自古兜鍪爲首鎔之名

干戈

王子年拾遺記曰庖羲造干戈以飾武此干戈之始也則兵爲起於大昊矣呂氏春秋云蚩尤造五兵

蓋其一也。

劍

管子曰昔葛天盧之山發而出金蚩尤受而制之以爲劍鎧矛戟此劍甲之始也。

戟

又管子黃帝問於伯高伯高曰雍狐之山發水出金蚩尤受而制之以爲雍狐之戟此戟之始也實錄謂自夏后氏始非也呂氏春秋云蚩尤造五兵戟其一也龍魚河圖曰蚩尤造戟也續事始曰魏武加蝦蟆頭幡。

刀

龍魚河圖曰黃帝時蚩尤造立刀戟郭憲洞冥記曰黃帝採首山之銅始爲鑄刀二儀實錄曰刀之制自黃帝與蚩尤戰卽有之。

槍

實錄曰黃帝與蚩尤戰時卽有槍漢諸葛亮始以木作之長丈二以鐵爲頭續事始曰亮置苦竹槍長二丈五尺也

矛

世本曰杼作矛管子曰蚩尤爲劍鎧矛戟呂氏春秋蚩尤作五兵有曾矛夷矛則矛蓋蚩尤所作也。

馬梁

梁簡文帝馬梁譜序。馬梁爲用，雖非遠法，近代相傳，稍以成藝。按曹操父子橫梁賦詩於鞍馬之間，則馬梁之事已見於此矣。豈其事之所起乎。

七首

漢王莽傳曰：莽避火坐宣室前殿，持虞帝七首，則七首之制，堯舜已爲其物矣。然兵械之原，多出於黃帝，亦其時事耶？按左氏魯曹沫執七首劫齊桓公。

弓矢

太白陰經曰：庖犧氏弦木爲弓，剡木爲矢，易繫辭曰：神農氏沒，黃帝堯舜氏作弦木爲弧，剡木爲矢，弧矢之利，以威天下。蓋取諸睽。山海經曰：少皞生般，始爲弓矢。世本曰：牟夷作矢，揮作弓。宋衷注云：牟夷揮，皆黃帝臣。郭璞弓矢一器，而作者兩人，於理可疑。以般爲是，墨子曰：羿作弓。荀子曰：倕作矢。呂氏春秋曰：夷羿作弓。張敦吳錄曰：揮觀弧星始爲弧。司馬遷著史記曰：黃帝之弓曰烏號。然則當以繫辭爲是。員半千射決曰：蚩尤作亂。黃帝始制弧矢。

弩

古史曰：黃帝作弩。吳越春秋陳音對越王曰：弩生於弓，弓生於彈，彈生於古之孝子楚琴氏以弓矢之勢，不足以威天下，乃橫弓著臂，施機設郭，加之以力，即是弩之始出於楚琴氏也。而周官司弓矢掌六

弓六弩其名物有唐大來庾之制則弩之起遠矣龍魚河圖則曰黃帝時蚩尤造五兵杖刀戟大弩也。

神臂弓

筆談曰熙寧中李定獻偏架弩似弓而施榦鐙以鐙拒地而張之射三百步能洞札謂之神臂弓最爲利器定黨項羌酋歸朝死於防圍蓋神臂弓之爲國用自定始也。

弓袋

實錄曰器仗皆自有虞氏始羈鹿施弓袋通謂之三仗蓋大將備儀也左傳曰左囊鞬右鞭弭是也禮樂記曰武王克商倒載干戈包之以虎皮名之曰建橐注建讀爲鍵兵甲之衣曰橐

箭筒

又曰箭筒自有虞氏始也周禮有矢筈

射的

虞書曰侯以明之注云作射侯之禮以明善惡則射侯始見於堯舜矣至周有熊虎麋犴三正五侯後世就簡但爲射的蓋侯之遺意也射以量計之亦三正五正之遺事也俗亦曰射帖

鳴鏑

前漢匈奴傳曰冒頓作鳴鏑應劭曰驍箭也遂以射殺頭曼單于者

斬馬刀

漢成帝時朱雲請上方斬馬劍斷張禹頭以厲其餘則斬馬劍之名已見於漢代矣宋朝神宗熙寧中又製斬馬刀其犀利則莫比蓋亦取漢氏舊名爲稱也

六 穀

實錄曰商有驁阜絲爲之似蚩尤首黃帝內傳曰玄女爲帝制玄驁十二以主兵是則驁自黃帝始

旗幟

列子曰黃帝與炎帝戰以鵠鷂隼爲旗幟故今旗物或綵錯爲鵠鷂取諸此也太白陰經曰蚩尤建旗幟黃帝內傳曰玄女請帝制旗幟以象雲物此蓋旗幟之始也

五方旗

通典曰黃帝振兵設五旗黃帝內傳曰帝制五彩旗指顧向背黃帝出軍決曰攻伐作五彩牙旗青引東赤南白西黑北中黃是也亦自黃帝制之

鉦

黃帝內傳曰玄女請帝鑄鉦鏡以擬雹擊之聲今銅鑼其遺事也

鐸

鬻子曰禹治天下以五聲聽爲銘書於簾簾曰告寡人以事者振鐸禹世已有此也

角

徐廣車服儀制曰。角前書記所不載。或云本出羌胡。一云出於越。黃帝內傳曰。玄女請帝製角二十四。以警衆像。禮義纂曰。蚩尤師魑魅與黃帝戰。帝命始吹角作龍鳴以禦之。蓋角肇於黃帝氏也。谷儉角賦夫角。蓋黃帝會羣臣於泰山。作清角之音。號令之限度也。軍中置之。以司昏曉。故角爲軍容也。

韜

唐韻曰。鼙上鼓。鼙。裨也。裨助鼓節。亦作韜。今軍行馬上所擊是也。黃帝內傳曰。玄女請帝制鼓鼙以當雷霆。是則黃帝製之以伐蚩尤也。呂氏春秋曰。帝嚳令倕作鼙鼓之樂。又云。倕作韜以節鼓。

韜

呂氏春秋曰。倕作韜。鬻子曰。禹爲銘書於箕箒。語寡人以獄訟者揮韜。音挑

鞍轡

桓寬鹽鐵論云。古者繩韁草鞬皮薦而已。後代以革鞍而不飾。六韜曰。車騎之將軍馬不具鞍勒不備者誅。推此當是三代之制。蓋黃帝始服牛乘馬。疑車騎也。

鞭

說文所爲驅遲者也。古用革以爲之。左傳曰。鞭之長不及馬腹是也。後世代之以竹。故或謂之策。蓋策之以箠馬。太王杖馬箠去邪是也。虞書曰。鞭作官刑。則得名於堯舜之代。始以爲薄刑之用。

鐵蒺藜

事始云鐵蒺藜菱角等起於隋煬帝征遼東置之要路水中以刺人馬非也按諸葛亮與司馬懿相持於武功五丈原亮卒懿追之亮長史楊儀多布鐵蒺藜則三國之際已有其物非自隋煬帝始也漢文帝時晁錯言守邊議云具蘭石布渠答注云渠答鐵蒺藜也此又漢初事爾雖然非三代仁義之守也

楯

山海經曰羿與鑿齒戰於草疇之野羿持弓矢鑿齒持楯春秋元命包曰帝嚳戴干宋衷曰干楯也王嘉拾遺記曰庖犧造干此則楯之起也

旁排

實錄曰旁排自牟夷始也或曰旁排近世兵杖中有鏢牌蓋出溪洞之蠻熙寧中王師征交趾其法乃盛傳於中國至神宗設於行陣令諸軍習之也宋朝會要曰太宗聞南方以標槍旁排爲兵令蕭延皓取廣德軍習之軍士之用標牌此其始也

柝

易繫辭曰重門擊柝以待暴客蓋取諸豫說文櫟夜行所擊今擊木爲聲以代更籌者是俗曰蝦蟆更櫟卽柝乃古今字耳

戰陣攻守部第五十一

事二十

兵法

沈起吳子序曰。兵法始於黃帝。其後得其傳者。周太公。齊管仲。吳孫武。魏曹操。蜀諸葛孔明。其書皆行於世。

戰爭

呂氏春秋曰。蚩尤作兵也。利其械。未有蚩尤時。民固削林木以戰。黃帝與炎帝戰於版泉是矣。爲戰爭起於炎黃之際也。

陣列

史記曰。高陽有共工之陣。以平水害。於是始有陣。

陣圖

吳子序曰。諸葛孔明天地風雲龍虎蛇鳥。本一陣也。出黃帝兵井之法。於魚復沙上累石八行。爲陣。世謂八陣列也。晉桓溫見之曰。此常山蛇勢也。後人之爲陣圖者。從此。

傳令

書大禹謨。有苗弗率。禹乃會羣后。誓於師曰。咸聽朕命。此軍中傳令之始也。以夏后氏爲之始。先鋒

孫子曰。軍無選鋒曰北。周宣王之北伐也。六月之詩曰。元戎十乘。以先啓行。則先鋒。周人制也。殿後

桂苑曰殿軍後也語曰孟之反不伐奔而殿左傳曰黃夷前驅孔嬰齊殿宜與先鋒同起於周制也

伏兵

易曰伏戎于莽左氏北戎侵鄭公子突曰君爲三覆以待之杜預注云覆伏兵也周公繇易言此疑亦三代之事爾

火攻

孫子之書有火攻故齊田單有火牛之事左傳桓公七年二月乙亥焚咸丘公羊曰樵之也樵之者以火攻也穀梁曰不言邾咸丘疾其以火攻也六帖云始火攻

水攻

國語智伯攻趙襄子決汾水灌晉陽城不沒者三版觀此二者非先王仁義之兵也蓋出於戰國吞并之世云

京觀

左傳楚子曰明王伐不敬取其鯨鯢而封之於是乎有京觀推此而言則是有征伐以來則有其事

烽燧

玄女戰經曰諸見舉烽火傳言虞虜且起黃帝出軍決亦有望見烽火之文周幽王爲褒姒舉烽燧疑亦自初用兵卽有之也

營壘

史記黃帝與炎帝戰於版泉以兵師爲營衛此營壘之始也其後兵之所居因曰軍營樓櫓

莊子曰魏武侯欲偃兵徐無鬼曰偃兵適兵之始也變固外戰必盛鶴列於麗譙之間郭象注麗譙戰樓之名卽敵樓也疑周襄戰國時始有之云

雲梯

墨子曰公輸般爲雲梯之械左傳曰楚子使解揚登樓車文王之雅曰臨衝閑閑注云臨車卽左氏所謂樓車也蓋雲梯矣當是三代之制而公輸加機巧爾續事始曰魯人公輸般造以攻宋城可以凌空立之太白陰經謂之飛梯

礮石

漢書甘延壽投石絕等倫張宴曰范蠡兵法飛石重十二斤爲機法行三百步延壽有力能以手投之今邊城有礮蓋出於范蠡飛石之制因事增廣遂爲今法此蓋其始也事始曰諸葛亮圍祁山昭於陳倉亮起衝車昭以繩連石磨四角擊其衝車車折卽礮事矣而唐書李密傳密使田戍造廣雲旛三百具以機發石爲攻城械號將軍礮

戎車

古司馬法曰戎車夏曰鉤車商曰寅車周曰元戎則戎車出於夏后之前至夏始名也

戰舟

墨子曰公輸般自魯之楚爲舟戰之具謂之鉤拒此戰舟之始也太白陰經曰水戰之具始於伍員製之以船爲車以櫓爲馬云

戍邊


紂之時西患昆夷北難獮狁文王以紂命遣戍役以守衛中國采薇所歌是也其事起於商辛失道之世

出軍

筆談曰宋朝太祖制禁軍更戍之法欲其習山川勞苦遠妻孥懷土之戀兼外戍之日多在營之日少人人少子而衣食易足以禁軍出軍之始也又京師衛兵請糧者營在城東卽令就西倉在城西卽就城東倉仍不許僦車腳皆須自負以使之盡力制其驕惰故士卒衣食無外慕安辛苦而見使也

避僧

蘇氏演義曰鄴洛記云北齊忌黑文宣帝殺第七弟上黨王渙以七者漆也屬黑又僧衣多黑而出師決勝之辰多所避忌北齊始也今行軍出師之日忌見僧尼者始自北齊之所忌黑也云爾



事物紀原卷十 凡五部共一百六十二事

軍伍名額部第五十一凡四十事

軍兵

古者兵隱於農無軍民之別隋唐以來雖有府衛之制亦有番次入則爲兵出則爲農五代多故始刺其手至周太祖乃刺其面給以廩食自是兵民始分也

禁兵

自西魏始作府兵而其法備於隋唐唐兵志曰唐有天下兵勢三變其始盛時有府兵已而廢爲彊騎又廢而爲方鎮及其末也強臣悍將兵布天下而天子亦置兵於京師曰禁兵又曰唐承隋制置十二衛府兵及罷始置神策神武等軍曰禁軍此禁兵之始也

涅面

唐書劉仁恭傳曰天祐三年朱全忠自將攻渝州仁恭悉發男子十五已上爲兵涅其面曰定霸都兵之涅面雖自周上皇始亦原於劉仁恭定霸之事也

遞兵

宋朝會要曰建隆二年五月詔諸州府以軍卒代百姓爲遞夫先是天下郵傳率役平民至是太祖始

盡易之。三年正月又詔郡國起今後不得差道路居人充遞運腳力。蓋遞鋪之以兵卒。自宋朝太祖始也。

等樣

建隆三年五月太祖以六師老壯不等乃蒐揀強勇士謂之兵樣散降諸道令依樣招收其後募兵之制爲木杖差以尺寸高下謂之等杖設旗及賞募之此其始也。

忠佐

又曰五代有內外馬步軍都頭漢置都引進使宋朝去引進之名端拱二年又改曰御前忠佐。

指揮使

唐書兵制曰僖宗幸蜀田令孜募神策新軍爲五十四都離爲十軍以左右神策軍大將軍爲左右神策軍諸都指揮使此名指揮使之始也五代有鐵騎護聖等軍皆置指揮使自此諸軍皆有之蓋起於此也。

都頭

又曰田令孜募神策新軍爲五十四都頭以都將亦曰都頭此名都頭之初也後又有捧日都頭李筠自此以來諸軍之置都頭蓋取諸此也。

五代會要曰周顯德中世宗以驍勇之士多爲外諸侯所占於是募天下武藝超絕及有身首者爲殿前諸班因有散員散指揮使內殿直散都頭之員

御龍等直

宋朝會要曰太平興國二年詔改簇御馬直曰簇御龍直骨錄子真曰御龍骨錄子直○以下不著所出者皆出宋朝會要

捧日鋗直

雍熙四年五月改殿前司曰騎鋗直指揮爲捧日鋗直驍猛爲拱宸

天武

皇祐大饗明堂記云五代禁軍號控鶴年多者號寬衣控鶴太平興國中改控鶴爲天武寬衣控鶴曰天武散手後又改爲寬衣天武唐天寶有天武健兒今取此名五代會要曰梁開平二年十二月改左右天武爲龍虎軍左右龍虎爲天武軍額諸軍有控鶴蓋梁已有天武軍矣宋朝會要曰太平興國二年正月詔改控鶴曰寬衣天武也唐書孔緯傳有天武都頭李順節

龍衛

五代會要曰廣順元年四月改侍衛馬軍曰龍捷左右軍宋朝會要曰太平興國二年正月詔改龍衛宋朝舊有龍騎興國二年改爲龍猛也

神衛

五代會要曰廣順元年四月改侍衛步軍曰虎捷左右軍御撰其名此虎捷名軍之始也宋朝會要曰乾德三年四月詔改西川感化耀武等軍爲虎捷太平興國二年正月改虎捷曰神衛

神勇

宋朝會要曰太平興國二年正月改威雄曰雄勇至雍熙四年五月又改爲神勇也

捧日

唐兵志中有捧日都頭李筠則是唐以捧日名軍也五代有鐵騎指揮宋朝會要曰太平興國二年正月改鐵騎曰日騎雍熙四年五月改日騎爲捧日疑取唐軍名也

小底

宋朝會要曰至道二年九月帝閱試前所擇兵士驍騎試弓箭中者六十人以殿前小底爲軍額步直

又至道二年九月帝親閱步兵試槍槊掉刀中者百人以殿前步直爲軍額

殿虎

雍熙四年五月改上鐵林爲殿前司虎翼腰弩爲神射

步虎

同前改侍衛步軍司鐵林曰步軍司虎翼

神衛水軍

大中祥符六年七月真宗謂近臣曰太祖朝多幸造船場製造兵棹蓋防水路用兵時神衛諸軍立水軍指揮以備其用蓋此軍額太祖時立也

虎翼水軍

真宗謂近臣曰水陸之兵有時而用不可久闕可以江浙淮南選取習水兵士立成指揮就彼置營其在京卽於諸軍選江淮人習水者立充虎翼仍於金明池側置營卽今虎翼水軍是也

驍捷

建隆二年十一月改左右雄捷左右騎武並爲驍捷左右備征爲雲騎左右平遠爲廣捷左右懷德爲懷順

効順

建隆四年八月賜河東樂平縣歸降人爲効順

懷恩

五代會要曰周顯德二年十二月以新收復秦鳳所獲軍爲懷恩軍則是周爲懷恩軍名也宋朝會要曰乾德二年二月詔遼州降軍宜以効順懷恩爲名用周事也

雄武

乾德三年九月二日諸道先奉詔於本城兵士內選擇驍勇者相繼到闕太祖親閱之中選者萬餘人馬軍以驍雄步軍以雄武爲額

克寧

又九月五日令諸州本城各置克寧指揮

歸聖

開寶七年十一月詔李從善部下及江南水軍並令黥面籍以爲王師以歸聖歸化爲軍額

保捷

咸平四年九月詔陝西緣邊州軍兵士先選中者並升爲禁軍名保捷

廣捷

咸平五年正月詔置廣捷軍伍指揮先是太宗開南方以標槍旁排爲兵帝卽位令蕭延皓取廣德兵習之至是試頗精練遂立是軍也

忠勇

咸平五年四月馬知節言州兵有不從王均爲亂殺賊者賜名忠勇升爲禁軍而月給依舊請選畱材勇者餘復退爲州兵帝曰旣稱忠順安可斥退令增給如禁軍例

崇武

太平興國八年三月改濮州平海指揮曰崇武。

振武

咸平五年五月命使臣分往鄆寧等十一州於保安保敬軍內選有力者一萬人升爲禁軍號振武景德元年七月簡集成四十指揮也。

神銳

咸平六年四月以河東州兵爲神銳神虎指揮先此自京師發禁旅戍河東數不足則取州兵材勇者補之十不得二三又弗整於是命張延禧料簡得三千人立爲此軍令常教習。

忠敢

景德四年十月三十日詔象州澄海指揮名曰忠敢以城守之功也大中祥符九年九月詔廣南東西荆湖南路選兵合澄海名曰忠敢分三指揮以備蠻寇。

奉先

大中祥符四年五月真宗宣示永安指揮以奉諸陵軍額猶隸西京本城廂軍可賜名奉先升爲禁軍寧朔

祥符四年九月宣示咸平中朕因揀閱諸州招到兵士爲有人材堪充馬軍者置寧朔指揮。

清衛

祥符八年置左右清衛二指揮以奉宮觀從修玉清昭應宮司之請也十二月景靈宮會靈觀募置到廂軍詔立爲清衛左右第二指揮

寧海

又八年三月詔名瓊州蠻蠻指揮曰寧海

定功

九年九月秦州曹瑋請選軍士堪充牀子弩手者詔立爲秦州定功指揮

崇節

天禧元年四月杭州言本城老浙兵指揮乞別立軍額詔以崇節爲名

建威

又五月曹瑋言準詔於本城諸軍揀到秦州鄉士之人知山川道路諸識蕃情乞降軍額詔立充秦州本城建威指揮

平河

至道二年八月楊尤恭引販私鹽三十九人見太宗曰此皆久習江湖宣團爲平河指揮以備舟船閒用

帶甲剩員

剩員

真宗咸平五年七月四日以軍士三十三人隸剩員皆支體廢者不忍遽棄令廩給如故自是率以爲例

律令刑罰部第五十二凡三十
四事

律

風俗通曰臯陶謨虞始造律後漢張敞上疏曰臯陶造法律急就章曰臯陶造獄法律存也史記曰李悝造律晉刑法志曰秦漢舊律其文起自魏李悝撰次諸國法著法經唐書曰時所用律起自魏文侯師李悝然皆罪名也通典亦曰又以爲商君受之以相秦至漢天下既定命蕭何次律令也孫奭律令義曰名例者漢九章散而未統魏始集罪例號爲刑名晉賈充以刑名法例爲篇北齊高叡并曰名例衛禁者晉始有衛宮之名北齊附以關禁隋勅蘇威更新律名衛禁職制者晉本名違制隋更曰職制戶婚者漢九章專爲戶律北齊附以婚事名婚戶隋更曰戶婚廢廄庫者漢歷北齊或名牧產隋益以庫事名廄庫擅興者漢名興律魏陳羣定法名興擅北齊改文從繕隋定曰擅興賊盜者魏李悝首制賊盜二法後魏曰盜律賊律北齊合爲一周分爲劫盜賊叛隋更名賊盜律鬪訟者後漢始析前世繫

訊律爲鬪律。北齊附以訟律。後周改鬪競。隋後齊名詐僞者。魏世始分賊律。創名之後無改。雜律者。李悝首曰雜法。後周更爲雜犯。隋去犯字還爲舊名。捕亡者。李悝首制捕法。後魏益曰捕亡。北齊改曰捕斷。後周易曰捕逃。隋世復曰捕亡。斷獄者。李悝始造因法。魏世分出此篇。北齊合於捕斷。後周復曰斷獄。陳彭年唐紀曰。太宗正觀二年正月丁亥朔房玄齡與法官刪定律十二卷五百條。令二十卷。比隋律減死入流九十二條。減流入徒七十一條。

令

說命曰。王言惟作命。不言臣下罔攸稟令。是則王者之言下守之而爲令也。今令之文皆所守之事。宜以此爲始。杜周曰。前王所定著爲律。後王所定疏爲令。六帖云。蕭何攬摭法令。宜於今者乃著令。唐紀曰。太宗正觀中房玄齡刪定律令三十卷一千五百條。

律疏

唐刑法志曰。自玄齡等更定律令訖。太宗世無所更改。高宗卽位。詔律學之士撰律疏。則律疏蓋起自唐高宗時也。宣宗時張戣以刑律分類爲大中刑律統類。故五代以來又有刑統。

刑

尙書呂刑曰。蚩尤作五虐之刑曰法。至舜乃命臯陶明五刑也。世本曰。伯夷作五刑誤矣。呂氏春秋又謂臯陶作刑也。

獄

急就章曰皇陶造獄風俗通曰三王始有獄夏曰夏臺商曰羑里周曰囹圄動止周曰稽留

臺獄

唐書崔隱甫傳曰隱甫拜御史大夫初臺無獄凡有囚則繫大理正觀時李乾祐爲大夫始置獄隱甫執故事罷之後患囚往來漏泄復繫除院則臺之置獄自李乾祐始也

囚

有罪而繫獄者曰囚疑古有之故詩泮水曰淑問如臯陶在泮獻囚

赦

虞書眚災肆赦則是赦之起蓋始於帝舜也

斷屠

唐刑法志曰武德二年詔斷屠日不行刑會要曰武德二年正月二十四日詔自今後每年正月五月九月及每月十齋日並斷屠按此則是斷屠之制起於唐高祖也杜佑集歷代沿革事爲通典前此無文而首載武后聖歷二年事驗此可知也宋朝因之臨時限日云

五刑

唐刑法志曰。隋已前。死罪有五。徒流之刑。鞭笞兼用。數皆踰百。隋始定之爲笞刑五。自十至五十杖刑。五自六十至百。徒刑五。自一年至三年。流刑五。自千里至三千里。死刑二。絞與斬並用。爲五刑。皆今世循用者。蓋自隋始也。三代以劓、刖、荆宮、大辟爲五刑。

絞

古者棄市。周禮有聲於甸人之說。秦曰磔。漢文帝二年改曰棄市。取刑人於市。與衆棄之之義。隋謂之絞。則絞蓋興於周代矣。

斬

尸子曰。黃帝斬蚩尤於中冀。黃帝內傳曰。擒蚩尤於版泉之上。帝以金鉞斬之。則知斬起於軒轅也。

配

舊云刺面而配。起於周太祖世宗之代。按王溥五代會要曰。晉天福三年八月。左街從人韓延嗣徒二年半。刺面配華州發運務。蓋唐雖有配流嶺南諸州之文。此始有配法。而刺面當起於是也。

加役流

唐刑法志曰。太宗卽位。長孫無忌議。絞刑二十。皆免死而斷右趾。裴洪獻以謂五刑而刖足是六也。於是除斷趾法爲加役流。蓋自唐太宗始也。

流

黃帝內傳曰。帝斬蚩尤。懸首軍門以威天下。其衆流於八荒之外。卽流刑之始也。舜去四凶族流共工於幽州。放驢兜於崇山。竄三苗於三危。殛鯀於羽山。又其事也。故舜典曰。流宥五刑。五流有宅。

徒

周禮。凡民有罪。役諸司空。卽徒之始也。孫奭律音又曰。舊制犯徒者。依年配。犯流者。流至配所居作。皆不決杖。宋朝建隆四年。制徒者加杖免役。流者加杖留住。居役一年。加役流三年也。

笞杖

書曰。鞭作官刑。卽笞之始也。扑作教刑。卽杖之始也。唐虞之盛。與肉刑並用。及漢齊太倉令淳于意有罪當刑。少女緹繫上書。文帝怜其意。爲除肉刑。始專用笞杖也。

折杖

宋朝會要曰。建隆四年三月。張昭請加役流脊杖二十。配役三年。流三千里。脊杖十九。二千五百里。脊杖十八。二千里。脊杖十七。並役一年。徒三年。脊杖二十二。年半十八。二年十七。一年半十五。一年十三。杠一百。臀杖二十九。十八。八十七。七十五。六十三。笞五十。杖十四。十三。十八。下。二十七。下。舊據獄官令用杖。受杖者皆背臀。腿分受。殿庭決者皆背受。至是始折杖。又徒流皆背受。笞杖者皆臀受也。孫奭律音又曰。舊制應決杖笞者。皆依數決之。宋朝建隆四年。始有折杖之制。

杖制

又曰舊制杖皆削節目常行杖大頭二分七釐小頭一分七釐笞杖大頭二分小頭一分半皆長三尺五寸建隆四年張昭等定常行杖昭請官杖長三尺五寸大頭闊不過二寸厚及小頭徑不過九分小杖長四尺五寸大頭徑六分小頭徑五分今官府長用者是此蓋其始也

桎梏

山海經曰貳負之臣曰危與貳負殺窶窳帝乃桎之於疏屬之山桎其右足又曰大荒之中有宋山有木名楓蚩尤所棄桎梏也蓋此械已出黃帝時今枷錮卽其遺事耳

枷重

宋朝會要曰淳化二年九月勅所司置枷徒流罪重二十斤死重二十五斤蓋舊制有長短而無斤重則枷之有等重自此其始也又景德四年五月河北提刑司勘事杖以下抗拒不招當枷問者未有定制請置枷重十五斤也

梟首

昔黃帝斬蚩尤懸首軍門此梟首之起也左傳曰叔孫昭子殺豎牛投其首寧威之上秦漢曰梟首始於黃帝之斬蚩尤顧野王玉篇曰梟首秦刑也今謂之簽首級

贖

世本曰夏作贖刑呂刑曰穆生訓夏贖刑則贖刑疑書名也按舜典曰金作贖刑注謂誤而入刑出金

以贖則贖罪蓋始於虞氏也。

錮身

春秋左傳曰會於商任錮欒氏也。則禁錮之事已見於春秋之時。故漢末有黨錮。今以盤枷錮其身。謂之錮身。蓋出於此。

除名

何法盛晉中興書曰胡母崇爲永康令多受貨賂除名爲民。此事不他見。疑始於晉。

免官

後漢梁崧爲太僕作私書請託郡縣發覺免官。按漢世三公有冊免則免官自漢始也。

胥吏附八條以吏爲奉法者皆附於此

堂後官

宋朝會要曰堂吏自唐至五代率從京百司抽補。開寶六年五月七日以武德縣尉姜宣義等充堂後官。太祖知堂吏擅中書事權多爲姦贓。故令吏部選授堂吏用士人自此始也。太平興國九年五月以將作監丞李元吉子佐爲堂後官。京官任堂吏自此始也。十二月以王渾綦佩爲贊善充職。朝官之任堂吏自此始也。神宗元豐五年行官制除堂後官之名於門下省中書省置錄事而已。通典曰唐武德中始於諸州調左吏遂促年限優以次序有至上縣尉者。

主書

通典曰晉中書有主書之員齊爲主書令史陳去令史之名北齊初曰主書令史文宣帝嘗立遣主書令史題署嫌其遲語曰但著主書何煩令史字自此除之也

主事

又曰主事二漢有之漢光祿勳有南北庭主事范遷光祿主事是也後魏於尚書諸司置主事令史隋煬帝去令史名但曰主事隨曹閑劇每十令史置一主事雜用士人唐用流外

都事

又曰尚書有都令史隋皇初改爲都事

令史

又曰令史漢官也漢官儀曰能通倉穎史籀篇補蘭臺令史漢韋彪疏曰往時楚獄大起故署令史以助郎職事也按史記項羽本紀曰陳嬰者故東陽令史則是秦有令史矣晉灼曰漢儀注令史曰令史丞吏曰丞史而周禮六官之屬皆有史以掌書

書令史

又曰晉宋蘭臺寺有正書令史北齊尚書郎判事正令史側坐書令史過事此蓋令史之始也

教練

唐會要曰大中六年五月勅天下軍府有兵馬處且選會兵法能弓馬人充教練使宋巨明皇二年蜀記曰天寶十五載正月十日楊國忠選監牧小兒於苑中教習請劍南舊將李福德劉光庭爲教練使教練之日當由此出也

鎮將

通典曰鎮將後周之通班隋亦置其職微矣注云今以其卑賤故舉隋而已合謂唐也五代以來皆諸郡所白置宋朝始有宣授宋朝會要曰太平興國二年詔藩侯不得差親隨爲鎮將自此皆用本州牙吏爲之亦有宣補者是也

布帛雜事部第五十三凡三十

布帛

禮運曰昔先王食鳥獸之肉茹其毛未有絲麻衣其羽皮後聖有作然後治其絲麻以爲布帛漢王逸機賦曰帝軒龍躍桑葉是創仰攬三光悟彼織女爰制布帛易曰黃帝堯舜垂衣裳而天下治蓋取諸乾坤孔穎達疏曰以前衣皮其制短小今衣絲麻布帛所作衣裳長大故云垂考此則布帛自黃帝制也

五采

董巴輿服志曰上古衣毛而冒皮後聖易之以絲觀翬翟之文榮華之包乃染帛效之始作五采成以

作服易以黃帝堯舜垂衣裳取諸乾坤。乾坤有文則五采與衣服同興矣。

錦

拾遺曰：員嶠山環丘有冰蠶，霜覆之然後成繭，其色五采。唐堯之時，海人織錦以獻，後代效之，染五色絲織以爲錦。丹陽記曰：歷代尙未有錦，而成都獨稱妙，蓋始於蜀記也。蜀自秦昭王時通中國，而三代已有錦，見於禮多矣。王嘉所記爲近之。

繡

事始曰：錦繡西施造非也。虞書命禹曰：予觀古人之象，日月星辰，山龍、華蟲作會，宗彝藻火、粉米黼黻絲繡，以五采彰施于五色，作服汝明。正義云：舜令禹制繡，以五種之彩，明施於五色，制作衣服，則帝舜始爲繡也。

纈

事始曰：夾纈。徹子造二儀實錄曰：秦漢間有之，不知何人造。陳梁閒貴賤通服之。潘氏紀聞譚曰：唐宗寶應二年，吳皇后將合祔肅宗陵，啓舊堂衣服，縉綵如撮染成花鳥之狀。玄宗柳婕妤妹適趙氏，性巧，因使工鏤板爲雜花，打爲夾纈。初獻皇后一匹，代宗賞之，勅宮中依樣製造。當時甚祕，後漸出徧天下。此似始爲夾纈之制也。

錢

管子又曰湯七年旱禹五年水湯以莊山禹以歷山之金並鑄幣以救人困至周太公立九府圜法始名以錢錢圓含方輕重以銖起於禹湯水旱之救民困也後魏高謙之以爲堯遭大水鑄錢故馮鑑謂錢起於堯也

金玉

管子又曰玉起於禹代金起於江漢珠起於赤野

大錢

國語周景王時患錢輕更鑄大錢韋昭注云徑一寸二分重十二銖文曰寶貨以勸農贍不足也而百姓蒙利後世權一時之用亦或行之事已輒罷蓋大錢肇於周景王也

鐵錢

通典曰王莽改革漢錢百姓皆不便之公孫述廢銅錢置鐵官鑄鐵錢則以鐵爲錢始於公孫述之據蜀也皇甫士安高士傳曰史弼迎送郭泰也輒再屈其泰一揖而去門人問之弼曰鐵錢曰故以二當一爾此漢末事也今鐵錢止行於川峽而二當銅錢之一自爾時已然也

錢文

錢貨之典尚矣周自太公立九府圜法其文無見景王鑄大錢班固云文曰寶貨秦漢則半兩五銖王莽則貨泉貨布後魏孝文太和十九年公鑄粗備文曰太和五銖又孝莊用楊福計永安二年福更鑄

文曰永安五銖。自是始以年號鑄於錢文。唐會要曰。武德四年七月十日廢五銖錢行開元通寶錢。自此又以通元爲文。高宗乾封中則曰乾封泉寶。肅宗乾元時則曰乾元重寶。五代會要曰。晉天福三年十一月詔鑄錢以天福元寶爲文。及僞蜀之制有光天咸康通正天漢乾德之號皆曰元寶。至於宋朝每改元又更鑄其號於錢文矣。蓋錢文之以年自後魏孝文太和始也。以寶者自周景王大錢始也。以通者自唐高祖武德始也。以重者自肅宗乾元始也。以元者自晉高祖天福始也。

錢陌

自古用錢貫皆以千百皆以足。梁武帝時自破嶺以東八十爲陌名東錢江郢以上七十名西錢京師九十名長錢。大同元年詔通用足而人不從。錢陌益少。末年遂以三十五爲陌錢以八十爲陌。蓋自梁始也。其事見通典。唐昭宗時京師用錢八百五十爲貫。河南府以八百爲貫。筆談曰。漢隱帝時三司使王章每出官錢以七十七爲陌爲之省陌。蓋自五代漢始也。

兌便

唐食貨志曰。憲宗時商賈至京師委錢諸道富家以輕裝趨四方合券乃取之。號飛錢。京師尹裴武禁之。盧坦請許商人於三司飛錢。每十增給百令大府給公據次以字號兌便。如盧坦請曰。鈔錢蓋唐飛錢之舊也。起於憲宗之世。

蹺墊

又曰憲宗朝吳元濟王承宗拒命經費盡竭皇甫鏞建議內外用錢每緝墊二十民聞墊陌至七十穆宗卽位來米鹽每陌錢墊七八所在用錢墊不一詔從風俗所宜則蹠之起自唐皇甫鏞也今俗謂明除者爲蹠暗蹠者爲墊

甲跡

今開元通寶錢綬上有文如初月者譚賓錄曰武德初行開元通寶錢初進樣日文德皇后搘一甲因不復改唐會要曰武德四年七月十日行開元通寶錢歐陽詢制辭及書字合八分篆隸三體回環讀之其亦通俗謂之開通元寶鄭虔會粹云詢初進蠟樣日文德皇后搘一甲跡故錢上有搘文熙寧中劉斧撰青瑣集則謂事由明皇楊貴妃而天下謂之曰兒錢謬矣彼徒見錢文有開元字便謂明皇開元事爾亦不考實之過也

火

禮會文嘉曰燧人始鑽木取火。魚生爲熟令人無腹疾。遂人之意故名燧人。世本曰燧人鑽木造火尸子曰燧人上觀星辰下察五木以爲火。淮南子曰燧人望辰心鑽木生火。拾遺記曰遂明國有大樹名遂後世聖人至其國息其下有鳥啄粲然火出聖人感之用小杖鑽火號燧人氏。河圖云伏羲禪於伯牛鑽木作火非也。白虎通曰謂之燧人何鑽木燧取火遂人之始。

燈

黃帝內傳曰。王母授帝九華燈檠。於是燈有檠。則注膏油以爲燈明。其前有也。法燭。

漢淮南王招致方術之士。延八公等撰鴻寶方畢。方法燭是其一也。餘非民所急。故不行於世。然則方法燭之起。自劉安始也。

針

禮記內則有紝針請縫之事。由此考之。當是自始制衣裳。則宜有針線矣。帝王世紀曰。太昊制九針。由此始。

繩

易曰。上古結繩而治。書序曰。伏羲造書契。以代結繩之政。則是繩出於太昊之前。高氏小史曰。燧人氏時。結繩刻木以記事。則繩自燧人氏始也。

沐浴

世本曰。秦穆公作沐。呂氏春秋曰。禹一沐三握髮。史記亦以稱周公。則禹時有其事。非秦穆公作也。木人

仙傳拾遺曰。始自黃帝臣左徹。帝昇天。乃刻木爲帝狀。率諸侯而朝之。此刻木像人之初也。金人

史記曰范蠡越王句踐之相也既雪會稽之恥乃乘扁舟泛五湖越王思之鑄爲其像則金爲人始於句踐也漢世匈奴休屠王乃有祭天金人後世以銅鐵鑄佛像自句踐始也

流杯

束晳對晉武帝問曲水事曰周公卜成洛邑因流水以泛酒故逸詩曰羽觴隨流晉以來三月三日曲水流杯卽其始隋大業記煬帝大修水飾以小舟行觴及唐豪貴作池亭引水爲之也

銘

蔡邕曰黃帝有金几之名王子年拾遺記曰黃帝以神金鑄器皆有銘題凡所建造皆記其年時此銘之起也

華表

古今註曰程雅問堯設誹謗之木何也曰今之華表以木交柱頭狀如華形似褐襖之狀或謂之表木應劭曰今宮外橋梁頭四柱木是也尸子曰堯立誹謗之木韋昭曰愚政事有缺失使言事者書之於木凡交衢道路悉施焉後世以石易之第取其觀瞻而已後人立於冢墓之前以紀其識也

書函

吳張溫使蜀謂先主曰謹奉所□兩書書之有函不前見疑自漢有也

土龍

淮南子曰土龍致雨許慎注云湯遭旱作土龍山海經曰應龍殺蚩尤及夸父不得復上故數旱而作應龍之狀乃得雨注云今之土龍取之則是湯作土龍述黃帝之事

童謠

列子曰堯微服游康衢聞童謠曰立我烝民莫匪爾極則童謠之起自堯時已然也

樓羅

幹事之稱也演義曰樓攬也羅綰也言人善當荷幹辦於事者能樓攬羅綰遂謂之樓羅西陽雜俎曰段成式在祕丘見同官說樓羅因天寶中進士有東西棚各有聲勢稍儉者多會於酒樓食畢羅故有此語成式讀梁元帝風人辭云城頭羅雀樓羅人著則知樓羅之言其起已久城頭網張雀樓羅會人著

稱漢

演義曰今俗罵人曰漢蓋晉末胡亂中原故胡人罵中國曰漢兒南人罵北人爲胡爲虜華夷自太始太素已還有國號者至多獨以漢名曰取兩漢盛者也按三代而上華夷之勢遠不相接雖春秋之間驪戎赤狄附見諸國然分土而守者大小尙二百餘其語難以一二指不得以一國名也至漢天子大同而武帝征討四夷專事匈奴由此有胡漢之斥也正如天竺文字自漢始至中國歷代非無翻譯之事其言梵語者必對以唐言則其事至唐而備所講求專故也

無恙

又演義曰時人以無憂疾謂之無恙神異經曰北方大荒中有獸食人咋人則病羅人則疾名曰羆羆恙也常近人村落入人屋室人皆患之黃帝殺之由是此方人方得無憂疾謂之無恙此其始也

不下驢

演義曰北齊湯愔字遵彥爲吏部尚書昔遭屯厄一餐之惠酬答甚厚性命之讐赦而不問及典選多以貌言恩舊時致謗曰有選人魯漫漢自言獨不見識愔曰前日在元子思方騎禿尾草驢以方麴障面見我不下驢何云不識竟不爲選用今俗以惡己者謂何處見不下驢蓋起於此今或有此語

麻胡

朝野僉載曰後趙石勒將麻胡性虎險鳩毒有兒號每輒恐之麻胡來號聲絕本草拾遺曰煬帝將幸江都命麻胡濬汴河以木鵝試波深淺止皆死每兒號言麻胡來自止人畏若是演義曰今俗以麻胡恐小兒俗傳麻胡祜爲隋煬帝將軍開汴河甚毒虐人多懼之胡祜聲相近以此呼之耳誤矣會稽錄云會稽有鬼號麻胡好食小兒腦遂以恐小兒若麻祜可以恐成人豈獨小兒也

姬妾

顏師古注漢書曰姬者周之姓貴於衆國之女所以婦人美號皆稱姬焉左氏傳曰雖有姬姜無棄憔悴姜亦大國女後因總謂衆妾爲姬史記云高祖居山東時好美姬是也按魏信陵君賂如姬竊兵符

奪晉鄙兵如姬、魏王幸妾也。當戰國時所云耳。

奴婢

說文曰：奴婢，古罪人也。論語曰：箕子爲之奴。周禮有女奚宜三代之制。

摸棱

世人以依違不正辨爲摸棱。按唐書蘇味道居相位不能有所發明。依違取容而已。嘗謂人曰：處事不欲明白決斷。若有差誤必貽咎譴。但摸棱以持兩端。時人號曰蘇摸棱。或曰味道爲相人所咨決無所可否。依違嗤嘲以手摸所坐牀。故曰摸棱。蓋此語之始自味道也。

墜子

晉石崇有妓名綠珠。趙王倫之亂。孫秀使人求之。王與秀收之。珠墜樓而死。後人因目姬侍爲墜子。由此始也。

草木花果部第五十四 凡二十

占稻

江淮之間有稻粒稍細耐水旱而成實早作飯差硬土人謂之占城米。真宗嘗植於苑中。始自占城國傳其種。遂植南方也。宋朝會要曰：大中祥符五年五月遣使福建取占城禾分給江淮兩浙漕并出種法令擇民田之高者分給種之。僧文瑩湘山野錄曰：真宗聞占城稻耐旱遣使以珍貨求其種播之始

植於後苑也。

胡麻

筆談曰。胡麻只今油麻也。中國之麻謂之大麻。張騫始自大宛得油麻種。亦謂之麻。故以胡麻別之。謂漢麻爲大麻。則是油麻亦自漢始來中夏矣。然本草已載胡麻。未知孰是。陶隱居注本草云。本生大宛。故名胡麻。

波棱

劉公嘉話錄曰。波棱菜。西國有僧將其子來。韋絢云。豈非頗陵國來。語訛爲波棱也。唐會要曰。尼婆羅國獻波棱類紅藍實似蒺藜也。

胡荽

博物志曰。張騫使大夏得胡荽。鄭中記曰。石勒改曰香荽。

大蒜

切韻曰。張騫使西域得大蒜而還。則自漢始有之也。

諸葛菜

今所在有菜野生。類蔓菁。葉厚多歧差。小子如蘿蔔。腹不光澤。花四出而色紫。人謂之諸葛亮菜。劉禹錫嘉話曰。諸葛所止。令軍士種蔓菁。何韋絢云。莫不是取其纔出可生唱一也。葉舒可煮食二也。久居

隨以滋長三也。棄去不惜四也。回則易尋而採五也。冬則有根可斬食六也。此蔬其利不亦博乎。禹錫曰信矣。蜀人呼蔓菁爲諸葛菜。

蘭香

本名羅勒。後趙石勒以羅勒犯己名。改爲蘭香。至今以爲名也。

苜蓿

本自西域。彼人以秣馬。張騫使大夏。得其種以歸。與葡萄並種於離宮館傍。極茂盛焉。蓋漢始至中國也。

牛尾蒿

右丞相傳曰。漢祖爲兒時。牧牛中野。與羣童戲。殺牛以烹之。埋其尾。僞報其家云。牛忽陷地。家人共引之。其皮骨愈深入於地。後其處生蒿作尾形也。

金錢花

西陽雜俎曰。毗尸沙一名日中金錢花。本出外國。梁大同二年進來中土也。

牡丹

隋煬帝世。始傳牡丹。唐人亦曰木芍藥。開元時。宮中及民間競尚之。今品極多也。一說武后冬月遊後苑。花俱開。而牡丹獨遲。遂貶於洛陽。故今言牡丹者。以西洛爲冠首。劉公嘉話云。世謂牡丹花近有蓋。

以前朝文士集中無牡丹歌詩。禹錫嘗言楊子華有書牡丹處極分明。子華北齊人則知牡丹花亦久矣。西陽雜俎曰前史中元說牡丹唯謝康樂集中言竹閒水際多牡丹段成式檢隋種植法並不記說則知隋朝花中所無。開元末裴士淹使幽冀至汾州衆香寺得白牡丹植於長興私第爲都下奇賞。至德中馬僕射又得紅紫二色者移於城中青瑣集有隋朝海山記中載牡丹品甚多而前賢所說如此。

一捻紅

今牡丹中有一捻紅其花葉紅每一花葉端有深紅一點如半指明皇時民有以此花上進者值妃子正作妝偶以妝指捻之燕脂之痕染焉植之明年花開俱有其迹亦見明皇雜錄也。

劉寄奴

金瘡藥也。昔宋武帝劉裕微時伐荻新洲射大蛇傷明日復往聞杵臼聲見數青衣童擣藥問之答曰我主爲劉寄奴所射今合藥敷之帝曰王何神不殺之叱之皆散收得藥時人因此名其草曰劉寄奴也。寄奴帝之小子。

何首烏

本曰夜合藤昔有姓何人見其葉夜交異於餘草意其有靈採服其根老而不衰頭髮愈黑卽因之名曰何首烏也。一曰卽其人姓名。

羊負來

博物志曰。洛中有人驅羊入蜀。胡泉子著羊毛。蜀人種之。曰羊負來。故今人亦以名泉耳也。陶洪景本草注曰。昔中國無此言。從外國逐羊毛中來。因以名也。

麋衡

本草曰。麋春日遊此既多卽瘦瘠。食此物乃復肥盛。因卽事名曰麋衡。

鹿活草

酉陽雜俎曰。天名精也。昔青州劉懨。宋元嘉中射鹿剖五藏。以此草塞之。踞然而起。懨怪而拔草。則復倒如此三度。因密錄種之。主傷折。俗呼劉懨草。亦曰鹿活。異苑所載正同。但以爲鹿草也。

丁公藤

南史解叔兼鴈門人。母有疾。夜於庭中稽頰祈告。聞空中云。得丁公藤治卽差。訪醫及本草無之。至宜都山中。見一老翁伐木。云是丁公藤治風。乃拜泣求得之。及漬酒法受畢。失翁所在。母疾遂愈。蓋自是始傳丁公藤也。本草謂之南藤。蓋宋朝附之於經云。

威靈仙

唐會要曰。德宗正元二年九月。鄧思齊獻威靈仙草。能愈衆疾。上於禁中試有驗。今編附本草。

史君子

唐潘州郭史君多以此療兒。得其效。時人因其刺史所用治小兒。故曰史君子。本草曰。俗傳始因潘州

郭史君療小兒多是獨用此物後來醫家因號史君子。

訶子

本出南海諸番國胡人謂之訶梨勒後趙時避石勒名改曰訶子故今猶云然也。

山藥

卽本草所謂薯蕷者也唐避代宗嫌名故民間呼薯藥至宋朝嘉祐八年四月英宗卽位人避嫌諱遂改曰山藥自此全失其本稱矣。

牽牛

本草補注曰始出田野人牽牛易藥故以名之。

安石榴

其生自西域漢武時博望侯窮河源回得其種遂傳中國也陸機與弟書曰張騫爲漢使外國十八年得塗林蓋安石榴也博物志曰張騫使西域回所得。

葡萄

亦出於大夏蓋與石榴同來中土漢書西域傳曰漢使歸葡萄苜蓿種來是也西陽雜俎曰庾信謂魏使尉瑾曰在鄴大得葡萄奇有滋味瑾曰此物實出於大宛張騫所致有黃白黑三種西域釀以爲酒在漢似亦不久杜陵田五十畝中有葡萄百樹。

橘奴

後漢李衡好貨殖。將死，其妻憂貧。衡曰：吾洲上木奴可了千匹絹。妻素不聞其有也。曰：此當謂橘耳。衡嘗於洲上植橘千株故也。後代緣有橘奴之語。六帖曰：李衡種甘橘千樹，號千頭木奴也。

金桃

唐會要曰：正觀九年十一月，康國獻金桃。詔令植於苑。又云：康國獻黃桃，大如鵝卵，其色如金，亦曰金桃。然則唐世始傳金桃也。通典作康居。云正觀二十一年。

胡桃

補注本草曰：胡桃。古今多言張騫自西域將來，與苜蓿等物同至中華也。博物志曰：張騫使外國回，乃得胡桃也。晉劉陶母書：胡桃本生西羌也。

萍藻

淮南子曰：海閒生屈龍。屈龍生容華。容華生蘋。蘋生萍藻。萍藻生浮草。凡根交者，生於浮草。許慎注云：海門浮草之先也。西陽雜俎作海閒生屈龍。屈龍生容華。容華生蘋。蘋生藻。藻生浮草。

蟲魚禽獸部第五十五
凡二十事

玄駒

古今注曰：蟻名玄駒何也。曰：河內人並河見人馬數十萬，皆如黍米動。遊人以火燒之，人皆蚊蚋，馬皆

大蟻今人名蚊蚋曰黍蟻曰玄駒宜自漢始也揚雄法言曰吾見玄駒之步云一云元駒非也

齊女

又古今注牛亨問蟬名齊女者何也齊王后怨王而死屍變爲蟬登庭樹嘯而鳴王悔恨故世名蟬曰齊女

膾殘

越王句踐之保會稽也方斫魚爲膾聞有吳兵棄其餘於江化而爲魚猶作膾形故名膾殘亦曰王餘魚

烏賊

西陽雜俎曰海人言昔秦王東遊棄筆袋於海化爲此魚中猶有墨而作袋形古今注云一名河伯變事小史

娵婦

東海有之昔有婦惰女織姑責之恚恨自溺於海化爲魚弱而多膏海人有得之者烹其膏以然燈照紡績則暗而無光或以照管絃嬉戲則爛然矣西陽雜俎云名奔鯨一名瀾

彭越

似蟹而小世傳漢醢彭越以賜諸侯九江王英布獵得之不忍視盡以覆江中化而爲此故名彭越

啄木

古今異傳曰。啄木本雷公採藥吏爲此鳥也。

逃河

鶼鶼也。本草曰。身是水沫。唯脣前兩塊肉如拳。云昔爲人竊肉入河化爲此身。今猶有肉。因名逃河。

精衛

山海經曰。炎帝之女度海溺死。其魄化爲鳥。爲此常銜西山木石。以填東海。報其冤也。

杜宇

蜀王本紀曰。鼈靈死。其屍逆江而流至蜀。王杜宇以爲相。宇自以德不及靈。傳位而去。其魄化爲鳥。因名此。亦曰杜鵑。卽望帝也。亦見杜甫李商隱詩。盧永城都記曰。蜀王杜宇稱望帝。好稼穡。治郫城。死化爲鳥。曰杜鵑。

婆餅

昔人有遠戍。其婦山頭望之。化爲石。其母爲餅。將以爲餉。使其子貯之。恐其焦不可食也。往已無及矣。因化此物。但呼婆餅焦也。今江淮所在有之。

野雞

卽雉也。自漢呂后稱制。避其諱故也。漢高后紀注。后諱雉之字野雞。顏師古曰。呂后名雉。字娥姁。故臣

下諱雉至唐高宗諱治又帝小字雉奴故相承避至今也

伯勞

西陽雜俎曰伯勞博勞也相傳伯奇所化。

右軍

晉右將軍王羲之好鵝在會稽山陰道士養羣鵝羲之每就玩之道士曰爲寫黃庭經當以相贈羲之欣然寫畢籠鵝而去今人誤以鵝爲右軍緣此故

衛子

世云衛靈公好乘驢車故世目驢爲衛子或曰晉衛珍好乘跛驢爲戲當時稱驢爲衛子以譏珍故有蹇衛之稱跛也

馬齒

事始曰唐正觀中有牝馬三千匹於隴西置羣牧使開元初張萬歲緝其政恩信大行旣沒衆以張氏諱因以馬歲爲齒或言倍二向三也

謝豹

酉陽雜俎曰號郡有蟲名謝豹常在深土中司馬裴沈子掘坑獲之小類蝦蟇圓如毬見人以前腳交覆首如羞狀能穴地如鼢鼠頃刻深數尺或出地聽謝豹鳥聲則腦裂而死俗因名之或曰謝豹人也

抱恥死。其魄爲蟲。潛行地中。羞見人故也。或掘出之。猶以足覆面作忍恥狀。然不詳其何時人也。幼歲聞故老言如此也。今人有恥辱事。或自以手掩其面。或人以手排已面是也。

狡

山海經曰。玉山有獸。其狀如犬而豹文。其角如牛。其音如吠犬。見則其國大穰。

畢方

義章山有鳥。其形如鶴。一足赤文白喙。自呼其名曰畢方。見之者主有壽也。

鹿蜀

杻陽山有獸。狀如馬。而白首虎文赤尾。其音如人歌謠。名曰鹿蜀。人佩其皮尾。宜子孫。

獛獛

拘扶山有獸。狀如犬而六足。尾長丈餘。名曰獛獛。其鳴自呼。取其皮可禦瘴癘。

螽墉音條

蜀山塗水東南流於江中。有螽墉狀如黃蛇魚鼈。入水有光。見則其邑旱。

犰狳

餘峨山有獸。狀如兔。鳥喙鴟目。蛇尾。遇人則佯服。名曰犰狳。其鳴自呼。見則蝗蝻爲害。

鴟

上黨諸山中多鶡似雉而大青色頂有毛角健鬪至死而止古之爲將士者取其毛尾插於冑上今軍士插雉尾卽此也。